

Contohi kepemimpinan Tun Razak kembalikan kegemilangan negara

BH- 8/7/2022 ml: 10

- Pemikiran aparteid yang menafikan hak bangsa lain tidak ada dalam kamus kehidupan orang Melayu

- Kerakusan dalam politik dan kepartian menjadikan pemimpin Melayu seperti hilang pedoman dalam mentadbir kerajaan

- Pemimpin politik Melayu perlu akur dengan teguran Raja-Raja Melayu supaya berhenti berbalah, tumpu usaha mensejahterakan rakyat

Oleh Dr Kassim Thukiman
bhrencana@bh.com.my

Sejarah orang Melayu memang menarik tetapi penuh ranjau dan berliku. Sejarah tamadun orang Melayu khususnya di Tanah Melayu menunjukkan bangsa ini mampu mencipta sistem pemerintahan dapat memayungi rakyat. Mereka menguasai kegiatan perdagangan antarabangsa.

Kejatuhan Melaka pada 1511 menyaksikan ia antara bibit awal bermulanya perpecahan Melayu. Ia diikuti dengan siri pengkhianatan dalam kalangan pemimpin yang sanggup berkompromi dengan penjajah.

Dalam pada itu, golongan ulama dan cendekiawan Melayu antara kum-

pulan yang sentiasa bangkit menyeru supaya mengukuhkan perpaduan orang Melayu dengan bertunjangkan ajaran Islam.

Orang Melayu juga dididik tidak pernah berhasad dengki dengan kejayaan orang lain, sanggup belajar daripada pengalaman peradaban Arab, India dan Cina yang masuk ke Nusantara lalu disesuaikan dengan nilai kehidupan mereka.

Boleh dikatakan pemikiran aparteid yang menafikan hak bangsa lain tidak ada dalam kamus kehidupan orang Melayu. Hakikatnya, ketika negara dijajah kuasa asing, pahlawan Melayu sering berada pada barisan hadapan. Mereka tidak sanggup peradaban bangsa dinodai kerakusan penjajah.

Ketika negara menuju proses kemerdekaan, perpaduan Melayu menunjangi kesepaduan politik dalam kalangan pelbagai bangsa yang wujud di Tanah Melayu.

Walaupun orang Melayu berhak menuntut pelbagai perkara dengan kuasa majoriti, namun orang Melayu dididik supaya bertolak ansur demi mewujudkan kestabilan serta keharmonian berterusan di negara ini.

Ini kerana agama Islam banyak memberi kefahaman penting dalam kehidupan orang Melayu. Mereka percaya kejadian manusia berbangsa-bangsa bukan untuk bermusuhan, sebaliknya patut bersama-sama demi kebaikan.

Justeru, ciri Malaysia yang unik iaitu masyarakat majmuk ditunjangi perpaduan majoriti Melayu dan Islam memberikan limpahan rahmat kepada rakyat negara ini sehingga tercetusnya agenda Keluarga Malaysia.

Sejarah membuktikan orang Melayu tidak menghalang bangsa lain menjalankan kegiatan ekonomi dalam kehidupan seharian mereka. Malah, orang Melayu sanggup berkongsi negara, satu pengorbanan sangat tinggi dilakukan bangsa merdeka ini.

Kepemimpinan negara diterajui sistem beraja dan sistem demokrasi sentiasa melontarkan kata-kata ke-

ramat perpaduan dan muafakat bagi kelangsungan bangsa dan negara.

Mereka perlu bangkit membawa agenda pembangunan berkepentingan Melayu-Islam, seperti digagaskan Za'ba, Burhanuddin Helmi dan Zulkifli Mohamad. Begitu ramai teknokrat Melayu masa kini mencapai kejayaan gemilang hasil daripada peranan pusat pengajian tinggi negara.

Pemimpin hari ini sepatutnya mempelajari ketekunan, kesungguhan dan kewibawaan Allahyarham Tun Abdul Razak untuk membawa agenda pembangunan negara di samping mengukuhkan kerjasama dalam kalangan rakyat bagi mewujudkan perpaduan nasional.

Beliau mengajak seluruh parti politik mengurangkan politiking, sebaliknya menumpukan segala usaha demi kesejahteraan rakyat. Beliau memerintah tidak sampai enam tahun. Itupun bermula dengan negara kucar-kacir akibat tragedi 13 Mei 1969.

“Pemimpin hari ini sepatutnya mempelajari ketekunan, kesungguhan dan kewibawaan Allahyarham Tun Abdul Razak untuk membawa agenda pembangunan negara di samping mengukuhkan kerjasama dalam kalangan rakyat”

Namun, kepimpinannya begitu terserlah. Pemimpin seperti Tun Razak adalah tokoh yang kita dambakan untuk mengembalikan kegemilangan negara.

Dalam hal ini, orang Melayu perlu diingatkan untuk kekal bersatu kerana dengan kuasa majoriti bangsa ini, ia mampu menyumbang kepada kestabilan politik, kesejahteraan rakyat dan kemakmuran ekonomi.

Orang Melayu juga tidak sepatutnya jumud dengan pemikiran 'Ketuanan Melayu', sebaliknya perlu mengisi agenda kemerdekaan berasaskan Perlembagaan, perlembagaan negeri dan Rukun Negara.

Agenda perpaduan Melayu sepatutnya memperkasa pembangunan orang Melayu dalam segala bidang, sanggup bersaing dengan bangsa lain dan tidak terikat dengan Perkara 153 Perlembagaan.

Perpaduan Melayu amat penting kerana ia ber-

kaitan dengan ketaatan kepada pemerintahan berasaskan sistem Raja Berperlembagaan. Di samping itu, orang Melayu mesti bersungguh-sungguh untuk memartabatkan Islam sebagai agama Persekutuan.

Sejarah menyaksikan orang Melayu terikat dengan ajaran Islam dan ia sangat mantap sehingga Islam menjadi sebahagian daripada cara hidup dalam budaya Melayu.

Namun, kerapuhan orang Melayu semakin ketara apabila kehidupannya semakin jauh daripada nur Islam. Gelombang globalisasi melanda dunia ketika ini dilihat antara faktor terhakisnya peradaban Melayu.

Lebih membimbangkan, kerakusan dalam politik dan kepartian menjadikan pemimpin Melayu seperti hilang pedoman dalam mentadbir dan menguruskan kerajaan.

Perpecahan dan perbalahan dalam kalangan pemimpin politik Melayu seperti sudah tidak terkawal. Perbalahan antara pemimpin Melayu seperti sudah menjadi normal dan tiada lagi perasan malu untuk bercakaran.

Pada masa sama, kehidupan rakyat semakin terhimpit akibat kenaikan kos sara hidup, penangan COVID-19 dan krisis global seperti kekurangan bekalan makanan dan tekanan ekonomi global.

Namun, pemimpin Melayu dilihat terus rakus memikirkan kepentingan masing-masing seperti berebut kuasa, berbalah sesama bangsa sehingga nasib rakyat terutama orang Melayu terabai.

Titah Yang di-Pertuan Agong dan Raja-Raja Melayu termasuk yang terbaru, Sultan Selangor, Sultan Sharafuddin Idris Shah menegur pemimpin politik Melayu supaya menghentikan perbalahan sepatutnya dijadikan pedoman untuk mereka berpolitik.

Sultan Sharafuddin menyifatkan perbalahan dalam kalangan pemimpin politik Melayu dilihat begitu ketara ketika ini dan boleh mengancam perpaduan, keharmonian hidup rakyat pelbagai kaum serta kestabilan politik di negara ini.

Bermakna, pemimpin politik terutama orang Melayu perlu akur dengan teguran Raja-Raja Melayu supaya berhenti berbalah dan menumpukan segala usaha dan ikhtiar demi mensejahterakan rakyat dan memakmurkan negara.

Justeru, pemimpin politik Melayu perlu melaksanakan amanah dan menegakkan keadilan demi kepentingan rakyat terjejas. Hakikatnya masih ada rakyat Malaysia terpinggir dan malang yang masih memerlukan bantuan dan pertolongan kerajaan.

Perpaduan Melayu amat penting dalam menjayakan pembangunan negara bangsa. Kekuatan Melayu-Islam menjadi tunjang yang akan mencorakkan citra negara-bangsa pada masa depan. Marilah kita sama-sama mempertahankan kedaulatan dan kemerdekaan negara sampai bila-bila.

Semua artikel penulis tamu adalah pendapat peribadi, bukan pendirian rasmi BH



Profesor Fakulti Sains Sosial dan Kemanusiaan, Universiti Teknologi Malaysia (UTM)